

BALLAPE

Seraina Friedli
termescha carriera

La Grischuna Seraina Friedli chala sco golia professionala da ballape. Suenten ina carriera en differents clubs da la Svizra e da l'exteriur ed en la squadra naziunala vul ella ir novas vias.

La golia *Seraina Friedli* termescha sia carriera da ballape. La passiuon na saja betg pli uschè ferma, argumentescha la Grischuna da 30 onns. Ella veglia ir novas vias professionalas, sco che la agertura da novitads Keystone-SDA scriva.

Gia la primavera aveva Seraina Friedli preni per l'emprima giada in zic distanza dal ballape e da la naziunala svizra suenter ch'ella sa sentiva stancla. Ella ha lura passentà duas emnas en ils culms, en la natira per tancar nova energia. Mo quai saja stà il cumenzament da la fin da sia carriera, ed in segn che quel capitel saja a fin, constatescha Friedli bundant in mez onn pli tard vers RTR. Uss vul la sportista oriunda da la Punt Chamuesch sa concentrar sin sia vita professionala.



Seraina Friedli termescha sia carriera da ballape, tranter auter sco golia da la squadra naziunala.

FOTO OLIVIA AEBLI-ITEM

L'emprim tar ils Lusitanos de Samedan

Seraina Friedli ha lantschà sia carriera il 2005 tar ils Lusitanos de Samedan. Suenten duas stagiuns tar il FC Tusaun-Cazas ha ella midà il 2012 en la pli auta liga svizra tar il FC Turitg. Cun il FCZ ha ella era festiva ses pli gronds success da la carriera e vegnida cun quest club sis giadas campionesa svizra e gudagnà quatter giadas la cuppa svizra. Vitier ha ella er pudì giugar cun Turitg en la Champions League. Tranter l'onn 2018 e 2022 ha ella er giugà per ils Young Boys da Berna e per il FC Aarau. Il 2020 ha Friedli fatg l'emprima giada il pass sur cunfins e giugà durant ina stagiun per Florentia San Gimignano en l'Italia. Dapi questa stagiun è ella stada sut contract tar il RSC Anderlecht en la pli auta liga da la Belgia.

Golia da l'equipa naziunala

Grazia a sias bunas prestaziuns è Seraina Friedli er vegnida clamada en l'equipa naziunala svizra. Ses debut en il tricort da la naziunala ha ella pudì dar il 2016 en in giu da qualificaziun per il campinadi d'Europa l'onn 2017, nua ch'ella e però vegnida nominada be sco golia da reserva. Era tar il campinadi d'Europa il 2022 sco als davos campinadis mundials la stad passada en la Nova Zelanda ed en l'Australia ha Seraina Friedli mintgamai stui sa cuntentar cun la rolla da reserva davos *Gaëlle Thalmann*. Tut en tut ha Seraina Friedli giugà durant set onns 10 giadas per l'equipa naziunala svizra.

Dasper sia carriera sco profi da ballape ha Seraina Friedli fatg a Berna in studi da psicologia e sport ed ella è stada l'emprima giugadra da ballape en Svizra ch'ha absolvì il 2018 la recruta da sport d'elita. (sda/trr/fmr)

LA CIFRA DAL DI

194 000 000 pachets

ha la posta svizra reparti l'onn 2022. Quai correspunda ad ina reduziun da 4% en congual cun l'onn precedent. Quella sminuziun è tenor la posta ina premiera ils davos diesch onns. (fmr/ri)

Convivenza rumantscha a Basilea

L'Uniuon cultura rumantscha Basilea e conturn (UCRBC) è vegnida fundada ils 18 da mars 2023. La nova cuminanza less unir ils differents interess da las Rumantschas e dals Rumantschs da Basilea e porscher ad els ina chaschun da s'entupar.

LUISA CADONAU/FMR

A Basilea vivan tenor l'Uffizi da statistica federal exact 241 pledadras e pledaders da lingua materna rumantscha. Fin ussa na devi betg bleras pussaivladads da s'inscuntrar per las Rumantschas ed ils Rumantschs en la citad da Basilea. Cun la fundaziun da l'Uniuon cultura rumantscha Basilea e conturn (UCRBC) ils 18 da mars 2023 duess quai sa midar. Sper s'entupar e dar ina baterlada less la nova uniuon crear ulteriuras purschidas per mantegnair la lingua e la cultura rumantscha en il nordvest da la Svizra.

Sentupada ad in «Café Rumantsch»

Gia l'onn 2019 ha *Brida Fuhr-Deplazes* inizià il «Café Rumantsch» a Basilea. La scuntrada mensila s'adressescha a pledadras e pledaders da lingua materna ed a persunas che han emprendi rumantsch. Il «Café Rumantsch» è in lieu d'inscunter lescher nua che Rumantschas e Rumantschs da tut ils idioms han la pussaivladad da dar ina baterlada e da mantegnair uschia la lingua er ordaifer il Grischun.

Il basegn per quest lieu da sentupada è avant maun – tenor il president da l'uniun *Simon Lombris* sa participeschan mintgamai enturn 15 persunas als inscuters mensils che vegnan actualmain organisà da *Brida Fuhr-Deplazes* e *Karin Luzi*.

Da temp en temp vegn in giast sin visita sco per exempel il chantatur engiadinais *Paulin Nuotclà* al proxim inscunter che ha lieu ils 27 da november 2023.

Nova uniuon en la diaspora

Simon Lombris è oriundamain da Sagogn e stat uss a Basilea. El ha gia instrui rumantsch ad uffants ed a creschids en la citad. El e *Brida Fuhr-Deplazes* èn vegnids contactads da la Lia Rumantscha cun la dumonda da fundar in'uniun.

La fundaziun da la UCRBC è part dal project «Rumantsch en la diaspora» da la Lia Rumantscha. La finamira da quest project è da sustegnair las Rumantschas ed ils Rumantschs che vivan ordaifer il Grischun. Sper l'uniun da Basilea èn 2022 anc vegnidas fundadas novas uniuns a Lucerna, Son Gagl/Appenzell, Winterthur e Berna. Las uniuns vegnan sustegnidas organisatoric e finanziar da la Lia Rumantscha.



Il «Café Rumantsch» è in inscunter patgific e la pussaivladad da dar ina baterlada en rumantsch a Basilea. Als inscuters èn envidads Rumantschas e Rumantschs da tut ils idioms e nivels.

FOTO FABIOLA VINCENZ

«Rumantsch en la diaspora»

«Rumantsch en la diaspora» è in project da la Lia Rumantscha che sustegna las Rumantschas ed ils Rumantschs che vivan ordaifer il Grischun. Quai pertutga radund in terz da la populaziun rumantscha. Quest project vegn sustegnì cun 50 000 francs da l'Uffizi federal da cultura. La finamira dal project è tranter

auter da pudair offrir ina purschida persistente per famiglias, uffants e giuvenils en la diaspora. Dapi 2022 datti sper Turitg nov era uniuns a Berna, Lucerna, Basilea, Winterthur e Son Gagl/Appenzell. (fmr/lu)

Dapi infurmaziuns davart il project «Rumantsch en la diaspora»: www.liarumantscha.ch.

A la fundaziun dals 18 da mars 2023 a Basilea èn 40 persunas sa participadas. La nova uniuon vegn presidiada da *Simon Lombris* ed el vegn sustegnì dals suprastants *Ueli Tschamper* ed *Ivan Demarmels*.

Excursiuns en il zoo u en claustra

En la UCRBC sa participeschan differents generaziuns che han divers interess. Famiglias per exempel han tschertgà il contact cun autras famiglias per ch'ils uffants possian emperder rumantsch cun uffants da la medema vegliadetgna. Otg famiglias cun 12 uffants fan part a la UCRBC e cuminaivlamain organischan els occurrenzas sco per exempel ina visita el zoo. Uschia pon ils uffants emperder rumantsch a moda plaschaivla. Autras commembras e commembres s'entaupan

mintga mais ad ina saira da chant. Il chor vegn dirigì da *Lukas Reinhard* e chantadas vegnan chanzuns da tut ils idioms.

Plinavant vegnan organisadas excursiuns culturalas sco per exempel ina visita da la claustra Mariastein a Beinwil ils 24 da schaner 2024. La grupa vegn accompagnada da l'anteriur directur dad RTR *Mariano Tschuor* che presenta il project «Viado el mund». L'istorgia da l'uniun UCRBC è anc giuvna e sia purschida vegn anc elavurada. Perquai è mintga interessenta e mintga interessent bainvegnì e po inoltrar ideas per occurrenzas per che las Rumantschas ed ils Rumantschs da Basilea possian sa scuntrar e viver lur convivenza.

Dapi infurmaziuns per interessentas ed interessents chatt'ins sin la pagina www.ucrbc.ch.

NA a colliaziun da via sid-ost a Domat

Il cussegl communal da Domat ha refusà il credit d'object per il project colliaziun da via sid-ost. Acceptà ha el il credit per la sanaziun dals implants da la scola Tircal.

CLAUDIO WILLI

La via da colliaziun planisada sid-ost è puspè ina giada vegnida debattada dal cussegl communal da Domat. Las votantas e votants avvan acceptà durant il mais november 2022 per pauc l'iniziativa dal pievel per ina colliaziun da via tranter la Via Musel e la Via Sid. Il cussegl communal aveva uss da decider en preschientscha dad in public interessà davart in credit d'object da 2,4 milliuns francs.

Il president communal *Erich Kobler* ha ditg ch'el avess gugent acceptà il project, ma che «ord vista actuala» stoppia la suprananza proponer da refusar il credit da construziun. Sin basa da las immisiuns da traffic actualas n'existia nagin basegn per ina via auxiliara. Quai mussia era il giudicat che la vischnanca haja laschà far dad in expert per il traffic, e ch'ultra da quai giess a perder terren agricul prezios. Ch'i na duessan betg «vegnir stgaffidas vias sin reserva», era il tenor da las fracziuns. *Jürg Rodigari* (FDP) ha ditg ch'el accepta il credit «sco in segn politic» per onurar la maiortad dal suveran. Il cussegl è suandà clemain cun 13:1 vuschs a la proposta da la suprananza da refusar il credit d'object. Il davos pled ha il suveran als 21 da schaner 2024.

Sanaziun Center dal stgalim aut

Il suprastant communal *Armin Tanner* (AdC) ha explitgà l'affar politic «sanaziun energetica

ed architectonica tract da chasa da scola e sala da gimnastica cun engrondiment scolina Tircal». Il complex implant da la scola Tircal deriva da differents onns da construziun. Ils criteris energetics e da gestiun na correspundevan pli als basegns dad ozendi. Il parlament è suandà a la dumonda d'approvar in credit d'object per la sanaziun da stgars 3,8 milliuns francs. Davart quel vegni votà als 21 da schaner.

Promoziun da linguas estras

La scheffa dal departement scola, *Nesina Ackermann* (AdC) ha declerà projects da votaziun, ils quals pertutgan la promoziun per uffants da lingua estra en scolina e scola primara. Appro-

và è vegnida la proposta da mantegnair il plan da piazzas actual sco era dad augmentar il plan da piazzas per 1,2 piazzas. Quai renda pussaivel da reparter las actualas trais classas da la quarta primara sin quatter classas – en questa 4. primara èn 53% uffants che nun han ni tudestg ni rumantsch sco lingua materna. En scolina èn stgars dals 47% dals uffants che han in background da lingua estra, en scola primara èsi stgars 40% dals uffants che nun èn ni da lingua materna tudestga ni rumantscha. «Ina sfida extraordinaria per la magistraglia, per cuntanscher la finamira da la furmaziun», ha ditg *Nesina Ackermann* ed ha engrazià per il sustegn da vart dal parlament.



Plan cun segnà en las vias ch'ins ponderescha da construir.

FOTO MAD